

դապետ Նալեան, որք եւ ճանապարհ արարին 'ի ծովու ։ Գրեաց նաեւ Գրիգոր Պատրիարք բազում աղաչանօք եւ արտասուօք առ Յովհաննէս վարդապետ եւ առ զլիսաւորս ազգին՝ միաբանիլ ընդդէմ թշնամոյ և վաստակիլ 'ի սէր Ս. Յակոբայ և 'ի վառս ազգին . չխնայել յինչս և յաշխատութիւնս , և մի երբէք վարանիլ վասն ծախուց , զի յամենայնի պատրաստ էր հոգալ զայն , զի պատրաստ եմ ասէր , վերստին արկանել զշղթայն 'ի պարանոց իմ 'ի վճարումն պարտուց . թէպէտ կամէր ինքն դնալ 'ի Կոստանդինուպօլիս , այլ Յակոբ վարդապետ և այլք արգիլին զնա , զի մի վնաս ինչ պատահեսցի 'ի բացահայտութեան նորին (1735 . 'ի 15 Յունվար ամսոյ) ։

Իսկ Մէլեթիոս Յոյն Պատրիարքն Երուսաղէմի նախքան զմեկնիլ 'ի Ս. Քաղաքէն՝ երդուաւ 'ի վերայ Աւետարանին Սրբոյ ընդ Գրիգոր Պատրիարքին Հայոց , և այնպէս զնաց 'ի Կոստանդինուպօլիս . և իբրեւ զէպ եղեւ ժողովիլ 'ի մի վայր ընդ Յովհաննու Պատրիարքին եւ երեւելի իշխանաւորաց երկաքանչիւր ազգաց , յետ երկար խօսելոյ եւ վիճելոյ 'ի վերայ խնդրոյն Երուսաղէմի , կամեցաւ խաբել զՅովհաննէս Պատրիարք և զորս ընդ նմա , որպէս խափեալ էր զԳրիգոր , տայ նոցա զայս կնքեալ և ստորագրեալ գիր յանդորրութիւն . եւ ինքն դրժեալ երդման իւրոյ , զհետ եղեւ յարուցանել զմեծամեծ խռովութիւնս որպէս ունիմք տեսանել յետոյ ։ Ահաւասիկ թարգմանութիւն նամակի նորին ։

Որովհետեւ թշնամին արդարութեան և խաղաղութեան ոչ երբէք դադարի արկանել խռովութիւն 'ի մէջ քրիտոնէից , ուստի պարտ է 'ի միտ առնուլ աշակերտացն Քրիստոսի թէ այսպիսի գրգռութիւնք 'ի սատանայէ են ։ Եւ ըստ Աւետարանին Սրբոյ հեռի լինել յայնպիսեաց եւ հետեւիլ պատուիրանաց Տեառն մերոյ . զի ըստ որում թեւադրութեամբ սատանայի յարուցին ոմանք վէճս եւ հակառակութիւնս 'ի մէջ բարեկամութեան Յունաց եւ Հայոց յԵրուսաղէմ յաղաղս թափօրի և հանդիսի Լուսաւորութեան , որ կատարի յաւուր երեկոյի Շաբաթու Ճրագալուցի ։ Մէլեթիոս Պատրիարքս Յունաց և Գրիգոր վարդապետն Հայոց , սակս չտալոյ տեղի անկարգութեանց և